

烏青鎮志卷四十二

清烏鎮同知董世寧原修

里 人盧學溥續修

舊聞下

張甸字述功烏墩人歸安籍崇寧五年進士調蘭溪尉時民有爭田中水溝者甲曰田有溝舊矣乙曰券有滕耳甯復溝邪甸呼耆老問水溝異名曰俗謂之𠵽又問田中徑曰俗謂之滕甸取券熟視曰易𠵽爲滕是殆匿溝爲己有也爭者語塞用薦升錢塘丞杭爲會府往來多要人寺僧義聞假權要勢占民產甸一繩以法無所顧望改京秩知桐廬縣縣劇政

烏青鎮志

卷四十二

舊聞下

一

率以猛甸獨示以恩信追科不煩而事悉辦給民健訟相侵漁尺度不明甸未嘗委官吏按視曰是徒爲紛紛擾民命圖狀來上反覆詰問往往情露更有隱欺稅租甸按治得實事上聞與賞格時戶部辟監麥科甸以道遠不便養親旬監越州鹽倉遷僉書甯國軍節度判官應賜緋衣銀魚甸以親老侍養無幾日願以身章責其親有旨從之未赴丁憂免喪監行在所諸司糧料甸自念祿不逮親矣上疏乞間再更宮祠會薦知南劍州尋易徽州或言郡經費不足甸曰必有蔽欺不歸公上者病在胥吏久之盡得鄰郡有留繫不決部刺史悉以委之渙然盡釋皆不寃任滿請老改京秩累遷朝奉大

夫爲文粹美有集三十卷藏於家

以下烏程周志

唐大韶性行淳篤事親一遵古禮敦睦族黨創唐氏祠廟置祀田修譜牒家訓及唐氏家禮疏遠近共以爲式淳祐中州司上其事於朝賜號養素先生表其鄉曰崇孝坊曰仁里徐繩甲汝嶧孫爲固始令李貴者盜魁也大吏飭捕之繩甲步行入其室擒貴貴叩頭求恕繩甲曰吾賞汝罪授汝爲捕頭汝能使邑中無盜乎貴曰能隨至會城陳其說大府允之曰此古人以盜治盜意也自此道不拾遺民用安堵

邱文璣白馬村人父子真不嗜仕進公幼卽知孝友好善不倦景泰間歲饑盡發私廩以賑有司欲題名于石公乃請題

烏青鎮志

卷四十二

舊聞下

二

父名助立含山塔一座造白馬鳳儀等橋十三處正統間以

富民占籍京師

以下桐鄉嚴志

錢承江幼承庭訓力戒侈靡垂髫時見客只服青布短褶在官猶課婦女紡織任巡撫時雖緋衣必以布夏則染赤苧爲之俸餘所積置田百畝名生生產以給族之鰥寡孤獨喪葬不能舉者子姓蕃衍咸食其德

王隆德任袁州府推官時撫按行部以條鞭之外復有值櫃收銀南糧民解爲里甲困擾及衙門供應取辦地方民苦之檄公與建昌推官陸鍵條議量加四差一切錢糧俱官解僉點吏書值櫃經收及各公署損壞什物置辦俱官給修補供

應夫馬悉給驛傳不許假借私派里甲請著爲令一時稱便焉

周孟侯母沈氏夢神人授五色符吞之而生公家貧無書有鬻史者公對母歎惋母卽拔頭上金簪授之曰汝能讀書成器吾不需此抽簪不覺髻墮公用是涕泣感奮獨坐小樓去梯三年讀古書史三千卷有奇借本鈔錄疊紙五尺許由是才藻豔發名噪一時南潯莊廷鉞以厚幣聘修明史公峻詞卻之得免於史案之禍人皆服其先見少時嘗夢拾古硯生花後人因以硯華名其堂

張伯升官華亭知縣提督馬進寶駐松江郡城縱兵肆虐公烏青鎮志

卷四十二 舊聞下

三

與知府祖永勳力爲撻拄俾不得逞十六年夏海氛由京口直逼金陵進寶屢召閣郡官議事一日脅取府縣印公慷慨言曰麾下取印何爲知縣守印如守土頭可取印不可取也進寶奪氣而止

夏開先字禹承伯曾孫友于兄弟以所授祖宅讓於伯兄又捐己產以償公債順治間寇盜充斥慨然以保障自任一方賴之

周雲杼以歲貢官錢塘教諭沈端恪公近思幼年困乏寄食僧寮公一見器之力贊其應試案發獲售寺僧卽欲閉門披荆公伏眾預伺突挾之出得補弟子員復延至學舍親爲講

肆遂成進士

金廷標入畫院供奉每作畫進呈輒荷御題稱賞有七情畢寫皆得真顧陸以後今幾人之褒迨其病歿後命將舊時粘壁之畫悉付裝池收入石渠寶笈

周孟侯先生拱辰慕陶淵明之爲人賦揮杯勸孤影詩二章其一云此影落人間如鶴在雞羣澆汝一杯酒我醉爾亦醺宛然醉龍蛻縱橫不可馴爾毋暫離我惟汝知我心其二云宇宙大如許覓伴不可得把爵勸汝酒與爾締知識夜深山月微依稀聞啜泣孤衷白不成淚痕同草濕二詩不載聖雨齋集從其家傳中鈔得之傳稱先生尙有感秋雜詠百首皆

烏青鎮志

卷四十二

舊聞下

四

三閭哀郢之意集中今亦不載又曾著邑乘八卷晚過錢江爲綠林所劫尤可惜也

以下桐鄉嚴志補遺

張伯升明府超官華亭令有惠政戶科給事中朱紹鳳爲作平役記略曰華劇邑也向有大役小役爲民患一經僉點立見破家公不履畝而田疇秩秩不下堂而閭版井井圖與冊爲經緯而貧與富爲消息往例十家互編綜覈次第公以國計軍糈一時告訕取五年而甲乙之若經催若總甲若該年節節俱有步驟事事俱有程限而無名之費不經之徵庶幾汰驛騷而免顛踣者公之賜也見仲志

張楊園先生和吳孟舉種菜詩八絕句不載集中今從于府

志藝文內錄出詩云處世無如用拙尊閒庭讀易蠹初捫五  
更清夢迴來穩汲水朝來齧菜根老圃秋容徑欲斜晚菘新  
韭長抽芽經過白雪青霜候許有西田好種瓜百味無如水  
草尊貪嗔當下把心捫由來古德培天厚襍俎生生養厥根  
周 意思也傾斜血味如何當草芽蟹蛤形容全混沌雪饞  
何似邵平瓜清瑤風範幾人尊眞率齏鹽有舌捫一味留唇  
思借箸雨餘最美塌顆根晚步山椒落日斜歸家閒摘錦葵  
芽燒來卻喜村醪熟呼得鄰翁更削瓜金盤玉鱠最稱尊好  
伴蓴絲把腹捫圃菜有滋薑芥辣鋤頭消卻老名根富貴浮  
雲向日斜鳶飛魚躍亦萌芽英雄有用歸無用造化生成八

烏青鎮志

卷四十二

舊聞下

五

月瓜

施喜亭明府福元以舉人官江西福昌縣甫下車入署見一  
老僧自內出恍悟前身適掾吏呈邑志因訊關帝廟某僧吏  
言已卒于某年月日卽明府降生之辰也未幾無疾而終見

續詩繫

周鐵霞中翰士燭久困場屋於道光庚子元旦夢遇一老人  
叩問今歲可得功名否老人手書功名何成四字示之覺而  
思之甚爲灰心不知是科正典試爲成公觀宣副典試爲何  
公冠英適合兩座師之姓遂與胞弟士炳同科中式因作志  
喜詩云又是秋風薦鶚天泥金喜帖快爭傳爨桐幸遇中郎

賞奪錦還輸季弟先白髮高堂勞切望黑甜奇夢記前緣功  
名發軔從茲始努力雲程猛著鞭士炳名列高魁後於乙巳  
入詞垣鐵霞則於咸豐癸丑考取內閣中書

張八愚比部桓爲桐邑名進士而生遭不造數月喪父母徐  
氏亦以毀卒育於伯母汪氏時伯父已先歿固所當後者也  
孔雅六廣文所選雙溪詩匯比部哀歌六首仿少陵七歌體  
而沈痛不啻過之附錄於後以諗來者

張桓哀歌六首 我生之初尚無患我生之後罹奇變父歸地  
苑泉路猶存得相見遺容展謁肝腸斷婢僕無情淚如霰  
白頭老病有王父肇錫嘉名予武疊遭慘痛竟不起神已  
彌留心獨苦猶含老淚一摩撫當時幼小不知悲今日追思  
涕如雨 有兄有兄早夭折鴻雁孤飛不成列雖言四海皆

烏青鎮志

卷四十一 舊聞下

六

兄弟終是秦肥視越瘠脊令在原難相急我獨何爲形影子  
兒襁褓兮母心煎兒長大兮母眼穿兒不就試兮母佛然  
兒拜別兮遂終天生不能養病不侍兒來母已歸重泉嗚呼  
兒今瘦兮誰知兒飢寒兮誰憐 有子有子三歲夭老親痛  
失掌中寶淚枯腸斷身隨隕白頭黃口音容杳死而有知得  
相見依然歡笑嬉懷抱汝魂尚小不知悲汝父沾襟汝豈曉  
祖母今年七十六哭泣過多衰更速我母委曲善養志眼  
底無兒不知覺一從我母歸重泉老淚涔涔無乾褥報劉之  
日苦已短日薄西山暈昧谷 有鳥有鳥室欲毀室欲毀兮  
于誰止白頭烏在苦網繆今日孤雛復何恃死者長已矣生  
者不得一巢處世間燕雀各得所雛乎雛乎命  
止此嗚呼歌有盡兮哀無盡悲風爲我颯然起

李臨川先生拳勺園小刻中載有夏公雲泉墓誌銘稱不佞  
師事一庵唐先生曾請及人間封翁事先生曰士大夫未必  
皆賢乃其封公則未有不賢者時不佞未以爲信然也今不  
暇旁求吾里自洪武迄今蓋二百餘年所矣僅僅沈公果齋

封刑部郎夏公雲泉封冀州守不佞先人封給事中三君子  
渾厚淵懿大略相同夷考其內德暨不佞母氏亦多以慈祥  
恭順稱然則吾師之言信不吾欺而臣子之被顯榮者誠不  
可不力思其本源矣云云因思人之掇科第膺仕宦者皆由  
祖父之積累而來而無識者輒自詡才能浪誇遭際不思樹  
德有玷鄉評往往一傳之後鮮克繼起而其先德之流傳固  
在人耳目也故此次重修桐志凡贈公列傳者有二十餘人  
之多有舊志無傳而爲之加傳者有舊志有傳而言之不詳  
特爲旁搜事實以增入者蓋卽宗唐先生之遺意云

青鎮節婦施荆山妻趙氏於乾隆六年旌表建坊崇福宮之

烏青鎮志

卷四十二

舊聞下

七

下岸咸豐十年粵寇之亂坊始被燬後其基爲匪人盜賣建  
屋鎮人構訟欲還其舊光緒二年經舉人盧景昌貢生皇甫  
福垕等請於縣卽刊基石移樹崇福宮內其訟乃息當經龔  
令鳳岐批准刊入新志以備稽考因坊表門未及載入補錄  
於此

顧龍皇甫文若之家僮也文若於明末客遊西安家遺妻子  
兩人瑩瑩子立順治十一年青鎮遭土寇吳阿留之變焚掠  
一空文若家亦遭焚劫龍左右維持得免於難助主經營銖  
積寸累得買田宅後龍死祀於皇甫家廟時論兩高之

明嘉靖間倭訐嘉興府崇德縣皂林塘伏屍橫野有無賴抵

屍所欲檢衣帶間物迨夜有光冉冉而來其人匿樹杪見一童子攜燈一老人隨後逐屍翻閱無首者弗顧也獨一屍體甚豐碩老人解衣裸身扶屍如人立交口相向俛抱片時老人遽墮地屍已蠕蠕動矣忽起立披衣著冠隨燈而去其人甚驚怖明日語人如此蓋修煉之人年力衰薄特易形以資壯盛然猶已僵者更有生人易形尤奇

石門余志

鈕景琦字玉海詩才鮮豔漁艇出桃花五字春日舟行句也可作桃源圖又八月早寒一聯小院苔乾蟲語咽空階葉落

烏聲愁亦逼真晚唐

嘉府許志

顧養默初謁選時不忍離父膝下父曰得官分俸養親兼可

烏青鎮志

卷四十二

舊聞下

八

瞻族黨不愈於株守故閭耶乃遵父命既自富川歸則出其

俸餘給三黨媼友

以下湖州府志

茅一皋字星海以恩貢授光祿寺丞萬曆戊子歲稔輸穀五千石賑濟得旨建敦義坊于花林里他如建宗祠置義田創橋梁助婚葬不可枚舉以子瑞徵貴封光祿寺正卿

茅元儀好談兵通知古今用兵方略及九邊阨塞孫承宗督師以書生辟幕僚常出塞相視紅螺山七日不火食從者皆無人色元儀自若尋以復四城功特授副總兵提轄遼海覺華關島署大將軍印旋以兵譁下獄遣漳浦

吳簡字仲廉桃墩人詩文溫雅古厚元季數舉于鄉人利遂



杜門績學吏嘗召之役簡儒衣冠操版築人多笑之尋以薦授郡學訓導陞紹興路學錄洪武四年應召至京試富民論簡請令疏渠以通漑課粟多者第其功賞上甚善之授崑山

主簿以疾辭歸優游林泉號月潭居士年八十二卒

以下震澤縣志

徐眞字宗正秋澤人永樂九年以吏員應舉入京授麗水縣丞職董銀礦時有匿礦銀至兩法大辟眞曰人命至重奈何以微鏹故置之死乎力請于上釋之與某閹同理礦事一日閹宴眞坐眞北向而已踞南面眞入怒曰若延我爲客顧坐若下耶閹曰此內臣舊例也眞大言曰某起草茅蒙恩得蒞百里秩雖卑亦王臣也何至屈刑餘下各揭奏上謫閹充掃

烏青鎮志

卷四十二

舊聞下

九

孝陵宣德五年御史薦眞爲兩浙廉吏第一入覲見一內臣執金瓜作欲擊狀視之乃前閹黨也退而歎曰我尚可進取耶遂致仕歸

徐琛字文玉眞之子也景泰五年貢入太學成化五年授泰甯知縣忽有虎突入城嚙人一日至縣庭吏人欲負琛避之琛不動持筆向虎曰我奉命宰此一方汝何橫暴若是虎俯首卽以筆擲其首叱曰速遠去虎銜筆出自此絕跡

沈天寶家貧授徒京邸三十年所主皆當世用事大臣而一無干請時論高之旣老中康熙四十四年順天鄉試

孫兆奎字君昌崇禎丙子與吳易同舉于鄉乙西南都亡兆

奎就易謀同起兵時號孫吳軍軍敗爲大兵所執同時有潘爾彪亦丙子舉人嘗在易兆奎軍中兆奎被執時爾彪臥病王錫闡家及聞變從牀上躍起若將赴鬪者門閉不得出乃繞室疾走至夜半以手擊案而絕

吳宗漢字廣平弱冠讀濂洛諸書慨然志聖賢之學學使者許彥嘗書其文後曰忠孝人也南都亡吳易黃蜚並起兵宗漢佐其兄振遠別成一旅爲聲援丙戌春振遠被執宗漢宿僧寺得免

沈世求任靖江教諭遇萬壽節邑令阮某過爲侈靡事語世求曰如此可謂敬君否世求正色曰敬君在於愛民今歲屢

烏青鎮志

卷四十二

舊聞下

十

侵而勞民傷財是謂累君令嘿然

震澤縣志別錄

邱顛伯

名

躬耕事大父廣文君及父處士祖父歿資其弟三

人讀書不替家學孝友惇篤稱于鄉

張楊園言行見聞錄  
嚴志孝友傳作邱顛字

伯岳係沿舊志之誤廣文君蓋指桃源教諭敬

周固軒先生榦志行醇篤無愧古人生平無他嗜好惟研精經書深探理奧著有四子書說約易庸春秋集義諸書說約尤爲精粹間有與朱子集註異者自謂非敢矜奇惟求歸於至當以闡明聖道而已

以下冷廬雜識

皇甫韻亭茂才坤情懷侗儻豪於酒詩筆亦俊詠菊云幾番疏雨潤老圃菊初黃月色一籬淡露華三徑涼秋深人比瘦

夜靜影俱香誰送白衣酒花前暢飲觴題沈鏡湖垂釣圖云  
江北江南汗漫游歸來逸興寄扁舟白蘋風急秋將晚一尺  
鱸魚欲上鈎得魚換酒且高歌鷺友鷗賓日日過愛向水雲  
深處泊滿船明月臥煙簑

徐瘦生茂才照工書喜爲詩家貧授徒自給中年後絕意進  
取課讀之暇兀坐高吟怡然自得嘗題聯齋壁云志不求榮  
滿架圖書成小隱身難近俗一庭風月伴孤吟詩藁甚富歿  
後皆散佚無存

按照詩有研餘小草見雙溪詩匯

張八愚比部桓績學能文兼工詩律乾隆庚戌會試詩題老

烏青鎮志

卷四十二

舊聞下

十一

當益肚朱文正公器其詩爲老手特拔之人額詩云天道惟  
貞一人心在自強敬爲難老術動卽永年方質勁霜彌茂花  
遲圃更香鞍矜神采壯鏡感鬢毛蒼此類邱陵小難齊日月  
光戒猶思抑抑謨蓋念洋洋本是無終始何曾有弛張健行  
歸體撰不息運乾綱後由文安縣令捐陞郎中素諳刑名學  
有所詳論眾皆服其公允遂主讞稿卒年五十有五疾亟時  
神明清朗案頭有水仙一本口占云那與春光再鬪妍羈魂  
一縷逼周年誰教垂死開雙眼得見凌波第一仙著有海隱

山房詩集

徐阮鄰宦成解組以平生所歷之境繪圖三十四幅各以四

字標題首頁曰圖作佛圖自題贊曰忽夢忽覺獨來獨往海闊天空水流花放萬里行腳十年折腰青山鶴怨白髮蟲雕梯仙無技搏鬼無力視此牟尼卽心卽佛

張春舫大令枋績學能文舉嘉慶辛酉孝廉由教習得知縣己卯歲將選矣是科捷禮闈試卷首題脩己以安百姓誤書脩作修磨勘罰停於庚辰歲殿試以知縣歸進士班銓選因賦游仙詩云可憐一闋霓裳詠證果翻遲十二年旋於甲申年卒

歙縣鮑菴飲先生廷博寓居吾里之楊樹濱好學博聞尤喜蒐羅散佚乾隆時開四庫館獻書七百種欽頒圖書集成旋烏青鎮志

卷四十二 舊聞下

十一

刻秘集數百種曰知不足齋叢書進呈乙覽宸翰題卷首有知不足齋奚不足渴於書籍是賢乎之句睿皇帝復賜以舉人兩朝褒寵可謂極稽古之榮矣所刻叢書校訂精審風行海內嘗謂與其私千萬卷於己或子孫不爲之守孰若公一二冊於人與弈襍永其傳後其孫曾輩以書爲業奇編寶笈價重藝林蓋猶食其報云

李鶴杉學博博聞強識才藻富有小試以長鬣呼餘皇賦受知於學使李芝齡師入邑庠第一人稱爲李長鬣道光甲午闈作爲副主試歙縣徐廉峯太史寶善所賞而正主試以次藝犯下黜之

發強剛毅足以有執也題文用血氣二字

旋於乙未獲售入都太史

招之往使在弟子之列李獻詩有名傾元叔登朝日恩感昌  
黎薦士年之句寓都門得詩盈篋編爲北行草其贈端木鶴  
田舍人一律最佳詩云歲星遊戲住人間車馬盈門自閉關  
一架籐花留散吏舍人寓寄園  
紫籐精舍十年薇省話清班海隅應詔  
恩原渥日下讐書老未閒料得韋編三絕後舍人著易  
指已刊等身  
事業付名山

徐敬齋明經斐然歸安籍博通羣書探研不倦尤好爲古文  
之學自唐宋以迄國朝採輯諸家辨其源流擷其精粹彙編  
成書其論唐文云唐人無韻之文率不可讀昌黎突然起八  
代之衰柳州起而與之敵古文一道葦路檻縷之功以二公

烏青鎮志

卷四十二

舊聞下

十三

爲首習之之精醇可之之警拔牧之之倜儻表聖之安詳襲  
美之縱恣魯望之簡古其嗣音也顧宣公之沁人肺腑衛公  
之絕塵而奔於韓柳雖非同調亦斷不可泯爰彙選而論定  
之他若漫郎之僻濇異常獨孤之菁華未備張文昌流傳甚  
少皇甫七客氣未除以及劉賓客白香山李玉溪羅昭諫諸  
人各有所長均非正軌概從舍旃其論宋文云自韓柳闢古  
文之一途至北宋而極盛蓋宋初尙沿唐季之習柳開鄭條  
穆修張景之徒挽之而不足歐公得昌黎文於破篋中登高  
而呼學者響應曾王三蘇輔而翼之徂徠涑水河南盱江二  
劉三孔潤色其間秦黃晁張后山方叔之流克承其緒於是

北宋之古文冠絕古今嗚呼觀止矣南宋之文導源北宋顧扶疎勁健則有之而微傷於剽而不留和平醇正則有之而究病其直而少致然粹然無疵文與理兼到者朱子而外實繁有徒亦學者所當從事也文鑑止於北宋兩宋合選寥寥罕覩而宋人文集搜採兩難南宋集尤少卽藏書之家亦未數數見數十年以來北轍南轅風檣篷底有所見卽借鈔或錄草稿以歸自辛酉迄壬辰首尾三十有二年得文一千七百六十七首釐爲十有六本顏曰宋文偶見極知不全不備掛漏良多然後之君子欲遴選兩宋文者其或將有取於斯今其書皆散佚無存惟所刊國朝二十四家文鈔及今文偶

烏青鎮志

卷四十二

舊聞下

十四

見行於世

柞溪沈組雲司馬

錦

一生厚德凡濟人利物之事往往傾橐

爲之其教子一以存心仁厚爲本長子曉滄

炳垣

季子胎簪

淮

一由孝廉一由拔萃科同時膺異命俾知縣事孫寶禾卽

於是歲爲諸生報施故不爽也

耐冷譚

張介柳名若齡原名大衍嘉慶戊辰中京兆試大挑得知縣補甘肅靈臺縣升靜甯州知州居官以儒術飾吏治當時無赫赫名去後或有餘思能詩擅填詞風流綽約得宋人之遺善談論四座風生居官數十年不脫學究氣事上官亦必自申其論不唯阿上官亦以爲老書生而或加重焉

以下金石錄

張績堂名學治嘉慶庚午膺鄉薦應禮部試出場失跌翻考  
具雜舊文稿一紙爲邏者持去呈某王爺以爲懷挾奏請斥  
革如例羣稱冤然不能辨

浙閩制府孫公名爾準字平叔患水腫經年以夢白先生薦  
差官延夢廬往診夢廬至公疾已不可爲診視畢問頃日所  
食幾何侍者從旁答曰此時胃氣大衰每日食只可七八碗  
夢廬驟聞訝然曰健飯若此何云胃氣已衰侍者曰爺不知  
較大人平日所餐已不及十之三矣因言公未病時常餐需  
供豬蹄十個他物稱是云

以下埋  
憂集

後珠村郭某者嘗自新塍賣布歸中途遇一皂衣人似富豪

烏青鎮志

卷四十二

舊聞下

十五

家奴邀至一處高閣魏煥彷彿官居入門一閹者引入見主  
人衣冠坐堂上狀貌偉然左右列侍數十人或冠帶肅穆或  
短衣草履主人呼問里居姓氏郭叩首自言無罪乞放還主  
人曰勿多言此定數也遂命左右設筵令郭與數十人者雜  
坐須臾樂作水陸畢陳酒數巡郭起告歸不許某哀祈不已  
主人不悅曰旣爾須記取來歲六月某日當於亭子橋西畔  
相俟勿爽約也郭諾而出至門外初月已斜回顧並無舍宇  
但見一古塚而已踉蹌奔歸言其事舉家亦不識何故無何  
至次年六月插種旣畢偕村中數人往東嶽廟看戲日晡始  
還行過亭子橋西未及里許同伴回頭忽不見眾異之相與

尋至橋西見郭危坐水際疑其將洗浴也呼之不應迫而視之死矣屈指計之適符六月某日之期也

雍正初吾邑沈博年者精拳勇善躍一日市中印家橋北某氏失火延燒河南幾及半里惟臨河南向一樓爲火所未及窗牖洞開中一女子韶顏稚齒側坐床沿紗厨內含笑若與人對語狀而自橋以北火勢拉雜無路可通救火者從橋上呼之出女端然不動時博年亦在橋上對岸火燄飛射簷前已著卽躡身冒火躍入樓中見女側一衣紅袍者髯髮皆赤以兩手持女腕若束縛然博年曳之不起隨舉床前一椅向赤髯者劈頭打落倏不見遂挾女飛出旣而博年歸家徧身

烏青鎮志

卷四十二

舊聞下

十六

紫腫呼痛不止次日延醫視之醫者曰火毒已中心胞不可爲也而博年呼號轉側未半炊許而已死矣

余父嘗言里中花家板橋南岸白楊樹昔嘗有一白雀來栖其顛樹大可蔭畝許其時凡雀之隨之者環集樹間殆徧迨暮白雀飛去而羣雀乃散如敗葉或言是雀之王也

餽餅阿六者邑北柵沈氏子名鳳翔自幼狡黠無賴少長以賭爲業而窩娼窩賊無不爲也凡遠近鹽梟積盜無非羽翼也郡邑胥役無非耳目也以故官府不能捕邑有烏將軍廟在司馬署南半里而近俗稱土地堂堂之前小賭場數十開賭者皆其爪牙也人呼爲堂前兵時東柵徐氏以居積致富



六之黨小木匠桃花橋等先以索詐不遂將尋釁未得間也  
一日徐命店夥往村中收賬還至三里塘日已暝乃就一相  
識家借燭籠以行適其黨與堂前兵經其門偵知爲徐氏店  
夥遂擁入誣以奸執而縛之搜橐中有番錢五十餘枚盡攫  
之去某歸白於徐某控六及諸人於縣縣令王故與徐有舊  
然不能治六遂揚言于眾曰有我在區區一縣令何能爲寄  
語徐某如不能制我我富有以報也徐聞乃赴省控諸巡撫  
差官至縣坐提不得差官乃密與幹僕數輩至邑中乘夜出  
不意先擒六交邑司馬某公乃赴湖州啟太守林公請撥武  
弁二人鎮兵二十與偕至邑并縛堂前兵數人而去巡撫委

杭州府某公親提定案六等七人俱問徒充軍者保長楊四  
一人中途堂前兵逸去三人惟六等數人解至其地未及兩  
月六已自紹興逃還石老蟲小木匠等亦自他邑返蓋有頂  
替在彼處應卯也六於是於北宮橋復開賭場其勢愈橫至  
七月娶妻某氏會者千餘人先是某氏本紹興良家女嫁爲  
某氏子婦琴瑟頗敦某氏子爲六所誘挾重貲隨六至邑中  
久不返其婦以念夫尋至遂家焉某自從六縱賭已耗其貲  
大半及是六窺其妻豔之乃復招某至家相與共博迨暮出  
土妓數輩勸酒漏旣下六起出某時已醉徑擁一妓入旁舍  
共戲甫就枕六率其黨持械而入執某及妓將殺之某願罄

囊中金以酬不許眾勸其更往取五百金益之便可釋卻且許售以此妓某辭以牀頭已盡眾曰汝家蓄有千金奇貨而不知耶某不解所謂眾教其以某氏歸六即日間所輸二百金亦可一筆勾去遂逼其書券某涕泣不忍六揮刀而前某於是飲泣署券眾卽蜂擁至某家呼其妻出告以某在六家卒病仆地救之不醒趣其奔視某氏卽隨之去入門見某無恙驚甫定而某遽前捉其臂頓足太哭良久乃哽咽而語以故妻駭絕欲返奔眾曳之曰汝得嫁沈郎亦何憾而更欲思歸事至此尙容汝自來自去耶某故亦桀黠顧見勢已難挽卽收淚慰其妻曰汝住此誠大佳卽復從我去恐終不免餓

殍也言畢拂袖而出而心中憤焰欲燒行數十步復返及門門已闔矣遂解帶自經於簷帶絕墮地乃歸將取索以往入門見燈火熒然四顧闐無人影痛哭不已旣思此時不知妻猶在否若得一見而死死亦可瞑於是攜燈就寢而輾轉不能成寐歷憶從前始與六遇攜貲偕來今所攜旣已蕩盡并其婦亦爲所賺遽躍起搥床大叫曰阿六汝莫喜也頃之天曉出至市中市一短刀藏之將伺便刺六未得也忽聞喧傳六方娶妻往探之知其妻已別抱琵琶相從不去矣憤極遽歸取所藏刀厲之袖而出自是更不復歸矣一日天微雪尋六至唐家術將至其門聞釘鞋聲閣閣然來趨視之六也厲

聲曰餽餅今夜乃相逢耶出刀刺之六騰右足起中其腕刀輒拋落以用力過猛其釘鞋已跌墮雪中某隨手拾得劈頭一擊恰中頂門六仆於地某復前擊之頂上數十孔血如箭激滿地都成紅雪而六已不復能動蓋六本禿髮而軀幹短小故所擊皆在頂上也某棄鞋取刀刺其腹立死奔至其家跌開門扇呼其妻出告之且責其負心將并殺之妻泣曰妾所以含垢忍辱以至今日欲得一見君面而死也今大仇已雪又何面目與君相見乎卽奪刀刺其喉急奪之已深入半寸血溢不止而仆於地某抱至牀上爲裂裳裹其創曙後始漸蘇此道光十六年十月間事也時廳司馬適在省某乃至烏青鎮志

卷四十二

舊聞下

十九

青鎮司自首巡檢某公詢知爲紹興人權令弓兵管押密使人諭令逃歸某以無貲難之與以五十金某始還攜其妻而去

杭城藩署前池中竈大小數十極爲蕃衍好事者或市餅餌碎而投之諸竈盡來水面爭食掀波鼓浪蹒跚可觀相傳國初時藩庫銀屢被竊緝賊久而未得後以陰溝淤塞召工葺之啓視有二屍一順一逆以首相觸填塞其中始知此爲盜銀之賊由池中而入者因畜竈以禦之自是盜始絕蓋此中只容一人出入能前進不能卻退二人始未相謀故適然相值不能退不能進而偕斃焉若吾邑上智潭之竈自宋代已

有之矣莫淵烏將軍廟記言紹興壬午有虜使道崇德聞之督吏取龜以獻吏俄感疾使者亦夢龜自訴而復歸焉或曰卽烏將軍之神蓋神物也然莫志言當時固有數十余幼時猶及見一兩頭今則絕不復見矣豈靈物之隱現有時抑地運使然歟

施某桐縣之青鎮人康熙己酉鄉試先期至省讀書與鄰婦有染榜發後座師訪之言及闈中已擬元因第二場表判中藩字少寫草頭故不錄施聞言面赤旋悟邪淫之報蓋鄰婦潘姓故也追悔莫及痛自洗心力行善事常述此以警人後

其子弱冠成進士

增訂不可錄

烏青鎮志

卷四十二

舊聞下

二十

桐鄉周鐵厓士烱少補博士弟子員屢試秋闈不售一日自佗處歸夜泊舟村落閒望見臨水一家有樓翼然樓窗外有碧火如環旋轉不定異而呼舟人訊之舟人見而駭曰縊鬼求代多作此狀吾屢見之矣此家必有將縊死者慎勿聲鬼爲人所覺且移禍於人周奮然曰見人死而不救非夫也登岸叩門大呼其家出問告以故大驚蓋姑婦方勃蹊婦泣涕登樓姑猶嗷嗷未已也聞周言亟共登樓排闥而入婦手持帶立牀前神已癡矣呼之踰時始覺舉家共勸慰之乃已周次日抵家夢一老人謂之曰子勇於爲善宜食其報周曰此何足爲善必欲食報者他不敢望敢問我於科名何如老人

笑而示以掌中有何可成三字寤而歎曰科名無望矣其明年竟登賢書是科主試者爲何公始悟夢語之巧合也

右台仙館

筆記

康熙辛巳夏桐鄉青鎮有張姓者舊家也貧甚賣住宅已拆卸爲白地有猪欄石板亦起而賣之正開掘間忽聞石板下鳴聲如鐘疑有埋藏告張共發之但見舊碗五十餘隻大小不等再欲掘時其土自陷漸深遂懼而仍以土石掩之

述異記

咸豐九年三月十六日夜鎮東壽聖寺塔忽放光明紅焰騰起照耀七層欄檻墻垣纖毫畢露歷一時許始斂鎮人皆見

之

王訪山筆記

烏青鎮志

卷四十二

舊聞下

二十一

烏鎮北柵地方裝車橋一帶素多浮屠之樞白楊衰草夜閃青燐有桐邑諸生周品江者歿後旅櫬亦厝於此祇以伯道興嗟每屆清明時節惟其妻攜麥飯紙錢伏地哭祭而已庚寅冬周棺忽爲盜刨開拋棄骸骨取其槥以去周妻聞之訴縣請緝旋經差役拘獲二匪訊供已有端倪不知如何遷延未結周之門人暨其妻痛沈冤之未能昭雪也復控于府尊委員履勘汛兵地保欲爲搪塞計貿貿然攜一骨甕來委員不能決忽有黃犬一頭奔至嗥跳草間俄卽躍入水中起伏十餘次銜一骨出周妻異焉急倩人泅水求之又得枯骨五十餘根惟骨猶未全且如先軫之喪其元時觀者如堵咸

相歎異想爲民父母者自當澈究嚴辦以伸國法而快人心也然此案若無犬之入水銜骨其不爲汛兵地保所蒙者幾希今乃藉此犬以獲其骨冥冥中殆有使之然者歟嗚呼犬

猶能爲死者雪冤謂爲義犬誰曰不宜

點石齋畫報石集

清咸豐間洪楊之亂通安橋拆毀架木通行橋南有張福昌冶坊于同治九年間搜買廢鐵鎔化鑪內忽發奇響聲震山嶽炸斃冶工血肉橫飛坊主乃撫恤死者家屬並捐鉅資重

建斯橋以便行人

以下採訪稿

民國十四年夏四月烏鎮西柵咸寧坊人和堂藥肆夥友海寧人葛金榮將同夥孫財生慘殺分屍三十六塊開腔破腹

烏青鎮志

卷四十二

舊聞下

二十二

骨骼支解若庖丁奏刀悉中肯綮此事轟動全鎮無不稱異人和堂爲桐鄉孫某開設其子財生在店肄業經理吳芸祥認有乾股孫亡後畀吳全權並託以遺孤吳悉心經營生意尚可吳家距店數武每日早出晚歸留孫葛二人守肆以爲常是夕吳歸後孫商諸葛欲出外觀劇葛頷之至十二時後方歸並市饌啖葛盡歡其肆左右鄰皆片板相隔終夜未聞有意外聲息次晨葛啟門匆匆而出見者意其如廁不疑有他迨吳到肆見雙扉尙扃將擊門人謂葛已早出門係虛掩入內見新鮮頭顱一具灶上腿骨二莖洗滌血水一盆遺棄厨下如初宰牲畜然駭極叫喊四鄰咸集當報崗警上樓搜

檢有菜刀一柄微帶血跡人肉兩蒲包骨骼一蒲包雜於藥材中牀下一缶鉢滿盛鮮血遂由警轉報法院蒞驗以殺害分屍三十餘塊填格卽命屍屬棺殮並帶吳芸祥到院研訊無辜暫予保釋一面緝凶辦理不逾月葛金榮爲嚴墓公安局捕獲引渡歸時已形瘦骨立如失知覺據供云當宰一羊並不知是人云案未結病斃于獄

烏鎮沈劍秋夙好古玩每至傍晚盤桓於肆博訪珍奇一日伴兩傭至市遇友邀飲妻王氏待至晚餐沈尙不歸乃遣傭往迎久無音信復遣三四人催促回報無踪次晨徧傳陳莊北張橋下發現浮屍沈子乃淵往視果父也大駭尋往迎之

烏青鎮志

卷四十二

舊聞下

二十三

二傭亦回據述昨夜伴主人歸經轉船灣東誤撞巡邏營弁陸榮昌等陸等氣燄高張主人酒醺亦不甘示弱陸等鎗械雜施主僕三人均遭毒打我二人被分府收押今始釋回主人生死未知乃淵及沈妻弟庠生王彥臣具狀訴於桐鄉縣知縣徐某蒞驗受傷四處腹不膨脹手爪無泥委係死後落河提訊陸弁堅不承認後經府院轉輾發委鞠訊勾拘人証往來奔馳經年未決財盡力疲無法再訴沈冤莫雪亦云慘

矣此清光緒三十一年冬日事也

以上  
新纂

烏青鎮志卷四十二